

Kamilah Dammers y su team di college Webber University campeon di e “NAIA Intervitacional 2014”

ORANJESTAD/MERCA - Aña 2014 ta mostra pa bira un otro aña grandi pa Kamilah Dammers, e hungado hoben di bowling di Aruba, cu ta formando parti di e seleccion nacional di bowling di Aruba, [atleta cu recientemente a wordo nombra atleta di aña 2013 di Aruba. Actualmente Kamilah Dammers ta studiando na Merca y ta forma parti di Webber International University (WIU), cual tambe ta su ekipo di bowling. Den College/University bowling ta ser hunga 2 nacional pa aña, esta e NAIA Invitationals y e USBC College/University Championship. E fin di si-

man cu a pasa a wordo hunga e NAIA Invitationals, cual competencia a trece 2 logro mas pa Kamilah Dammers den su careda di bowling pa aña 2014. Na inicio di e competencia -diabierna anochi- Kamilah Dammers a wordo premia door di NAIA su representantenan pa alcanza e 1st team all American (5 miho hungadonan di bowling di Merca), mirando cu den e mucha muhenan e ta rank na di 3 luga pa NAIA pa e periodo 2013-2014. Esaki sigur pa Kamilah Dammers ta un honor grandi mirando cu aña pasa e tabata den e 2nd team all American (ranking di 6 pa 10). Trahando

duro e la logra di eleva su nivel di wega pa logra postula su den e 1st team all American comodamente.

Pa locual ta e NAIA Invitational 2014 mes por wordo bisa cu diadomingo pasa Kamilah Dammers cu su University “Webber International University” mester a hunga e final contra di Robert Morris University. Akinan Kamilah y e team mester a gana Robert Morris University 2 biaha di cual nan a gana nan 3-1 y 3-0. Di e manera aki tambe nan a mantene nan NAIA championship di aña pasa, ganando esaki pa di 2 aña consecutivamente. □

